


LETTRE
DE MESSIEURS DE
l'Assemblée,

A Monsieur le Duc de Lesdiguières,

MONSIEUR,

 Nous auons differé de respondre aux deux premieres lettres qu'il vo^{us} a pleu nous escrire, pour reponse à nos precedentes, attendans que le Gentil-homme que nous auions enuoyé vers vous, nous eust rapporté plus particulièrement vos sentimens sur l'estat de nos affaires presentes ainsi qu'il à fait, nous ayant exposé bien au long vos aduis & bonnes intentions à ayder nos Eglises, pour recouurer le repos, seureté, & contentement que nous recherchons de la bonté de nostre Roy, lors que vous serez pres de sa Majesté, ou vous nous faictes entendre que vous vous acheminez. Ceste bonne affection, Monsieur, dont vous nous assurez amplement, nous conuiant aux tres-humbles remerciemens que nous sommes obligez de vous en rendre, augmente nostre desir de satisfaire ensēble par celle-cy à vos deux premieres lettres, comme la necessité de nostre entiere iustification que vous desirez entendre le requiert de nous, esperans que vous ayant leué tous les scrupules qui semblent vous arrester sur

A ij

le, suiuet de nostre conuocation & de nostre demeure en ce lieu, comme il nous sera tres facile, vous aurez agreable de conioindre vostre bonne volonteé à nos submissions pour obtenir de sa M. le fruiet de nos tres-humbles requestes. Et par ce moyen arracher à nos ennemis les trophées qu'ils esleuent contre nous, sur le doute que vous semblez faire de l'évidence de nostre iustice par vostre premiere lettre qu'ils ont publiée à cet effect. Surquoy nous vous supplions, Monsieur, de trouuer bon que pour vous resoudre de toutes ces difficultez, nous vous rememorions que la resolution que nous fismes lors de nostre separation à Loudun, de nous rassembler en cas de manquement des choses qui nous estoient promises, à eu pour fondement la parole qui vous fut donnée, & à Monsieur de Chastillon par Monseigneur le Prince, & Monsieur le Duc de Luynes, au nom du Roy, & par vous à nous, ce que nos Eglises ayans suiui de bonne foy, sous ceste condition confirmerent en toutes les Prouinces leurs deputez, ou leur en subdelegerent d'autres pour se trouuer icy le cas estant escheu. Il n'est ia besoing de vous rapporter d'autres preuues, ou compulser nos archiues pour vous remettre en memoire que les promesses nous furent faictes lors sous la condition de nous pouuoir rassembler, si elles n'estoient accomplies dans le temps: puis que vous mesme, Monsieur, estes le plus suffisant témoin que nous en puissions produire, qui recognoissez & nous confirmez de rechef ceste verité par vostre seconde lettre du 22. Feburier dernier ou vous nous dites en propre termes, *que ce qui nous*

a esté accordé lors de la separation de Loudun [sous promesse de nous r'assembler] à esté entièrement executé, dequoy nous parlerons cy apres, ayant esclairci ceste permission que vous desirez que nous puissions monstrier euidemment, & laquelle nous estimons deuoir estre iugée valable & suffisante sans contredit, & au gré des plus scrupuleux, si nous adionstons qu'outre l'interuention de mondit Seigneur le Prince, & de mondit sieur de Luyne, desquels l'eminente qualité en l'un, & la grande faueur de l'autre ne peuuent receuoir ombre de desadueu, nostre bõne foy a esté encore de plus appuyée sur la parole expresse de la propre bouche sacrée de sa M. de laquelle vous nous estes tesmoin irreprochable, quand vous nous le representez par vostre premiere du premier dudit mois, nous disant en ces mots, que ce que vous nous auez promis au nom de sa Maiesté a esté confirmé à Fontainebleau par sa Royale bouche aux Deputés de l'Assemblée de Loudun, lors qu'ils l'aduertirent de sa separation. Nous n'estimons pas qu'il nous eust esté loisible de desirer, ou de nous figurer quelque autre permission plus valable, ou vne assurance plus ferme que la sacrée parole du Roy. Le papier & l'ancre ne peuuent adiouster de poids, ny d'auctorité aux paroles des Rois. Et certainement nous eussions creu estre indignes de la grace de nostre Roy, & iniurieux à son auctorité, si nous eussions requis ceste permission sous vne plus grande seureté que la parole. Surquoy pardonnez nous, Monsieur, si nous vous disõs que nous ne demandâmes lors aucun breuet, & qu'on ne nous l'a point refusé. Il est vray au contraire que

lors qu'on pressoit nostre separation, on nous offroit bien de nous donner breuet pour nous rassembler si on ne nous faisoit iustice. Et plusieurs fois & des principaux tindrent ce langage mesme en plein Conseil à nos Deputez, qu'aussi bien ne doutoit on pas que no^r ne no^r rasséblassiōs. Mais nous qui ne craignons rien plus que ces peines, & telles rencontres que nos ennemis mēnagent tousiours à mal contre nous, desirions lors & insistions à remporter quelque contentement reel sur nos iustes plainctes, pour rassurer l'estonnement & la perplexité de nos freres, & refrener l'insolence de nos ennemis par tels tesmoignages de la protection, & des bōnes volontez du Roy enuers nous, à fin de n'y retourner plus, & pour ne tomber de rechef en ces labyrintes. Mais toutes nos instances ne peurēt rien obtenir, & fūsmes contraincts de nous contenter de ces promesses, dont les artifices de nos ennemis ont bien sceu faire naistre les inconueniens & les maux que nous preuoyons & en apprehendions. Telle ayant donc esté l'assurance & la permission de nous pouuoir rassembler qu'estoit il besoin, comme vous dites, Monsieur, que nos Deputez generaux fissent de nouveau instance au Roy pour nous le permettre? C'eust esté reuoquer en doute vn droit assuré, & preiudicier à nous mesmes. Car nous ne craindrons point de vous dire, ce qui ne vous peut estre caché, que nos ennemis ont fait sentir par diuerses experiences que toutesfois & quantes que les choses qui nous sont les plus assurées, où par les Edicts, ou par d'autres concessions du Roy, tombent en controuerses, ils ont

ce pouuoir de faire retracter ce qui nous estoit accordé, & nous faire perdre vn droit acquis. Nous pourrions monstrier infinies plaintes sur ce sujet, & comme sur plusieurs articles concernant la manutention ou execution des choses à nous auparavant accordées & depuis enfreintes, on nous a donné des responses directement contraires aux concessions precedentes, & qui les eludent du tout. Puis qui doutera que le meisme pouuoir de nos ennemis qui nous fait aujourd'huy desnier les choses qui nous ont esté promises, n'eust aussi fait reietter toutes requestes de nos Deputez generaux. Vous ayant donc, Monsieur, iustificié de la sorte nostre permission, & en consequence la droicture de nostre procedé autorisé sur icelle. Reste seulement de vous monstrier aussi euidemment les occasions, la condition, & la necessité de nous rassembler & de recourir à nos plaintes. Les circonstances du temps & de ce qui s'est obmis ou commis au cōtraire des promesses suffiront à cela. Il vous souuient, Monsieur, & vostre lettre nous en fait encore mention, que le Roy nous auoit promis q̄ dedans six mois du iour de nostre separation, il feroit rendre Leytoure, recevoir les Conseillers de la Religion au Parlement de Paris, bailler le breuet de la garde des places de seureté, que les estats d'icelles no⁹ seroiēt deliurez, q̄ nos Cahiers seroiēt respōdu fauorablemēt & les respōses executées de bōne foy. Et pour le regard de l'affaire de Bearn, que dedās sept mois les deputez du pays seroyent ouys sur ce qu'ils voudroient remonstrier à sa M. Nostre separation se fist le 13. d'Apiril de l'annee derniere, les six mois du iour

d'icelle escheoient au 13. d'Octobre ensuiuant. En tout ce temps rien n'a esté executé des choses promises hors la deliurance du breuet de la garde des places, quelque instance & poursuite que nos Deputez generaux en ayent peu faire. En ce mesme temps le Roys s'est acheminé en Bearn pendât ledelay octroyé pour leurs remōstrances, & icelles non entendues, ni attendues non seulemēt la main leuée a esté excutée, mais de plus nos Eglises ont perdu toute la seureté & liberté dont elles auoient jouy en ce pays là par si longues années, & en vn seul & mesme instant s'est ensuiui l'euenement de toutes les dangereuses consequences qu'on redoutoit des le commencement que l'arrest fust donné pour ceste main leuee. Sur ce temps les six mois passez ce grief surueni & nul des autres réparé, nostre conuocation a esté taicte au 25. de Novembre. Que si depuis la ville de Leytoure a esté remise à vn Gentil-homme de la Religion, la guerison de ceste vieille playe si long temps soufferte apres vne recente infiniment plus grieve, pouuoit-elle entrer en compensation pour arrester nos plainctes sur celle cy & sur toutes les autres qui restent. Nous estions desia assemblés, & nos tres-humbles remontrances desia présentées à sa M. quād les deux Conseillers ont esté receus, mais sous vne modification pire que tous les refus precedens, qui nous oste la liberté que le Roy nous a accordée par ses Edicts, d'entrer indifferenment auy charges, tellement que tant s'ēfaut que ce grief nous soit réparé, qu'on l'augmente en ce faisant. Telles donc ont esté, Monsieur, les occasions de nous rassembler qui subsistent enco-

re. Le miserable estat du Bearn, le deny de l'estat des places de seureté de Dauphiné qu'on maintient ouuertement (contre la parole qui vous esté donnée, & que vous nous confirmés icy par vos lettres) ne nous auoit iamais esté promis. Contre quoy vous scaués, Monsieur, qu'il nous l'a esté particulierement des l'annee six cens seise à la Conference de Loudun, & depuis par ces dernieres promesses faites à vous mesme. Comme aussi, outre les tesmoignages publics que vous nous en rendés icy, vous pouués vous l'ouuenir, que vous l'aués confirmé à plusieurs en particulier en les informant de l'absoluë necessité que nous auons d'en faire poursuite. Suit apres la contrauention faicte à l'article 27. de l'Edict touchant nostre admission aux charges. Les responses fauorables deniées à nos Cahiers, & l'enuoy des Commissaires par les Prouinces negligé. Et finalement les troupes & garnisons laissées dans les pays de Bearn, Guyenne & Poictou, qui donnent l'allarme continuelle, & vne iuste defiance à toutes nos Eglises. Ce sont les principaux chefs de nos plainctes ausquelles, non le nombre, mais l'importance donne le poids. Ioinct que ce peu d'articles en la reparation desquels nous auons esperé receuoir l'asseurance des bones volontés du Roy, dont nos ennemis s'efforcent de nous esloigner, ne doit estre tiré en consequence contre nous, ains au contraire nostre obeissance en estre de tant plus remarquable, que nous nous estions contentés de ce remede pour fortifier nostre patience au reste de tant d'autres infractions qui blessent continuellement la liberté que

le Roy nous octroye. Et pour la mesme raison nostre cause doit estre au iourd'huy plus fauorable, & nostre iustice plus manifeste, si ce peu d'article n'ayans esté executés contre les promesses de bonnes foy qui nous en auoient esté données, ains nostre conditiou estant mesme de beaucoup empirée; nous auons eu recours à la grace de nostre Roy, par la voye de nos tres-humbles Remonstrances, en l'estat auquel il nous à permis de nous remettre pour les luy presenter. Surquoy nous ne pouuons exprimer la poignante douleur que nous ressentons, quand pour ceste procedure que nous auons suiue par les voyes legitimes du respect & de la reuerence deuë à sa M. nous nous voyons criminalisés par les artifices de nos ennemis, qui nous calomnient de blesser l'autorité du Roy, a fin d'allumer son indignation contre nous rattachans de nous reduire à ce point, ou que nous encourions l'effect de sa colere par vne guerre ouuerte dont on nous menace. Ou que pour l'euiter nous nous taisions en nos iustes plainctes, & souffrions tous les maux que chaque iour on accumule sur nos testes. Si que desormais on ne recognoistra autre obeissance de nous, qu'une patience à souffrir tous les maux qu'on nous voudra faire, sans qu'il nous soit permis de nous plaindre. Et nos doleances & les precautions, contre les fraudes & machinations de nos ennemis seront expliquées à desobeissance & à crime.. Iugés vous, Monsieur qu'il n'y ait point de milieu entre ces choses? ains plustost recognoissant, comme il vous appert, que la permission qui nous à esté donnée par S. M. de nous rassembler & l'im-

portance des griefs, ou non réparés ou mesme accreus, purgent nostre Assemblée du blasme d'estre illegitime ou precipitee, nous esperons, que vous estimerés plus raisonnable d'employer la bonne affection qu'il vous plaist nous promettre & l'autorité & credit que la grandeur & le nombre infini de services si recommandables vous ont acquis pres de S. M. à luy faire entendre la sincerité de nos intentions, & la necessité de nos iustes plainctes, que de presser nostre separation avant ce contentement donné à nos Eglises. L'inquietude desquelles nous recommande plus soigneusement de persister à leur procurer ceste consolation. Pour à quoy paruenir, nous auons voulu conioindre aux voyes du respect que nous deuons à nostre Roy, celles qui nous esloignent plus de l'ombrage que nos ennemis taschent de luy donner de nous. Ayans à cest effect prié nos Deputés generaux, apres qu'ils nous ont appris le continuel refus qu'on faict de les ouyr en nostre nom, de représenter nos iustes demandes au leur, & de celuy de toutes nos Eglises. Enquoy nous nous persuadons, Monsieur, qu'approuuant nostre procedé, & fauorisant en iceluy nosdits Deputés generaux, vous iugerés aussi qu'avec tres iuste raison nous leur auons fait entendre, sur la proposition que leur derniere despesche nous donne à cognoistre qu'on fait à la Cour, de ne nous donner aucun contentement, & de nous vouloir obliger à nous separer sous vn pardon, que nostre conscience & le soin de l'honneur & du bien de toutes nos Eglises, ne souffriront iamais que nous consentions à ceste flestrisseure qui entraineroit

avec foy, outre l'opprobre sur nostre Religion, la ruine totale de nos affaires. Sur quoy nous auons desiré de vous informer de nostre sentiment & resolution, à fin qu'il vous plaise, selon la faueur que vous nous promettés, faire plustost cognoistre à S. M. que quand sa Royale bonté aura agreable d'octroyer les graces que nos Eglises requierent d'elle en route humilité, pour esteindre dans l'esprit de tant de peuples les defiances que les maux que nous souffrons, & les menaces continuelles de nos ennemis y ont fait naistre, elle ne fera qu'affermir de plus en plus son autorité, telle que la prudence incomparable du feu Roy son pere l'a tousiours conseruée, appuyant la tranquillité de son Estat sur la manutentiō de ses Edicts. Sous la vigueur desquels nous ne desirōs respirer avec liberté, que pour continuer l'obeissance que nous auons tousiours renduë sans reproche à nos Rois C'est là le bien lequel nous vous supplions, Monsieur, qu'il vous plaise contribuer à l'estat present de nos affaires, ainsi que nous en auons humblement requis chacun autre de Messieurs nos Grāds à diuerfes fois, & lors principalement que pour preuenir la ruine de tous nos affaires, par la diuision que nous auons preueu qu'on vouloit semer entr'eux & nous, nous les auons suppliés de n'entendre à vne entremise qu'on leur proposoit tendante à rendre de formais infructueuses toutes les poursuites que nous faisons par l'ordre establi entre nous sous la permission du Roy, & qui plus est à les charger enuers tous les nostre de la haine du refus, ou des tromperies dont nos malueillans eludent les promesses que la bonne volonté du

Roy nous accorde. Ce qu'estimans, non moins preiudiciable à eux mesmes qu'au general de nos Eglises, nous auons creu estre obligés en conscience de vous supplier tous de ny entendre. Ce que nous souhaitons aussi, Monsieur, que vous vueillies prendre en ceste part, & non pour vne exclusion du bien & aduantage que vostre autorité & faueur interuenant avec nos iustes requestes peut nous procurer. Car nous ne desirons, & n'auons autre but en l'acquit des charges qui ont esté données, que de reserrer autant qu'il nous sera possible le lien de nostre vniõ entre tous les membres de nostre corps, & principalement ceux de vostre qualité grandement plus considerables. Tant s'en faut que nous vueillions chercher le chemin de nous perdre en faisant separation entre vous & nous, qu'au contraire depuis que nous sommes ici nous n'auons trauaillé à rien plus soigneusement, qu'à rallier ensemble les particuliers, & le general par vne conionction d'interest, & vne mesme affection à l'aduancement de la gloire de Dieu & bien de nos Eglises sous l'obeissance de la M. En quoy nous auons à rendre graces à Dieu, que non seulement les villes & communautés de nostre Religion, mais aussi tous ceux qui tiennent vn plus grand rang entre nous, nous ont continué leurs assurances tres particulieres de leur fermeté en nostre vnion. Comme vous aussi, Monsieur, par la protestation que vous nous faiçtes du semblable, & de vouloir perpetuer vos seruices à l'Eglise de Dieu en la profession de nostre Religion. Surquoy nous vous dirons que

les calomnies contraires impudemment publiées par ceux qui haïssent vostre vertu à cause de ceste profession, n'ont iamais esbranlé nostre croyance. Aussi en ceste confiance & sur les assurances singulieres que Monsieur de sain Et Bonner nous à rapportées de vostre bonne affection à faire trouver en la grace du Roy contentement à nos Eglises en ces occurences, nous vous supplions derechef d'y vouloir contribuer ceste bonne volonté, en sorte que dissipant l'ombrage que nos ennemis s'efforcent malicieusement de donner de nous à l'autorité du Roy, nos sinceres intentions recogneües, nos Eglises puissent avec nostre seur & honorable retour vers icelles recevoir sur ces plus importantes plaintes le bien de si long temps esperé, & promis, & si necessaire à nostre conseruations & repos. Et qu'ainsi la paix de l'Estat pleinement affermie, nous puissions selon vostre souhait & de tous les bons François, voir l'arbitrage de la Chrestienté dans la main de nostre Roy. Et vous. Monsieur, par son commandement en plusieurs de ses meilleurs subiects, porter par la vostre victorieuse, la terreur de son nom & de ses armes sur les ennemis qui s'efforcent à bon escient, & plus que iamais auiourd'hui d'abbattre l'autorité & la dignité de ceste Monarchie, pour le bien de laquelle, & de l'Eglise qui y est recueillie, Dieu vueille augmenter vos ans &

les graces sur vous, de qui nous sommes pour
iamais

Monsieur,

*Tres-humbles & tres-affectionnez
seruiteurs, les Deputez des Eglises
Reformees de France & Souueraineté
de Bearn Assemblez a la Rochelle.*

DE LA CRESSONNIERE,

President:

ROSSEL,

Adioinct,

DE LA PITERNE, *Secrétaire,*

DE LA TOVR, *Secrétaires.*

A la Rochelle ce 18. Mars 1621.

THE
 OF THE
 THE
 THE

THE
 THE
 THE
 THE

THE